

明史
(三)

中華書局印行

總裁官總理事務 經筵講官少保兼太子太保和順人李士淳督吏部尚書加級賜諡忠肅奉
敕修

楊洪子俊 石亨從子彪 郭登
朱謙子承 孫鏗 趙勝 范廣

楊洪字宗道六合人祖政明初以功爲漢中百戶父璟戰死靈璧洪嗣職調開平善騎射遇敵輒身先突陣初從成祖北征至斡難河獲人馬而還帝曰將才也令識其名進千戶宣德四年命以精騎二百專巡徽塞上繼命城西貓兒峪留兵戍之敗寇於紅山英宗立尙書王驥言邊軍怯弱由訓練無人因言洪能詔加洪遊擊將軍洪所部才五百詔選開平獨石騎兵益之再進都指揮僉事時先朝宿將已盡洪後起以敢戰著名爲人機變敏捷善出奇搗虛未嘗小挫雖爲偏校中朝大臣皆知其能有毀之者輒爲曲護洪以是得展其才尙書魏源督邊事指揮杜衡部卒李全皆訐奏洪罪帝從源言謫衡廣西執全付洪自治尋命洪副都督僉事李謙守赤城獨石謙老而怯故與洪左洪每調軍謙輒陰沮之洪嘗勵將士殺敵謙笑曰敵可盡乎徒殺吾人耳御史張鵬劾謙因命洪代洪益自奮朝廷亦厚待之每奏捷功雖微必敘洪初敗兀良哈兵執其部長朵樂帖木兒既代謙任復敗其兵於西涼亭帝賜敕嘉獎又敕宣大總兵官譚廣等曰此即前寇延綏爲指揮王禎所敗者去若軍甚邇顧不能撲滅若視洪等媿不三年春擊寇於伯顏山洪馬傷足戰益力擒其部長也陵台等四人追至寶昌州又擒阿台答刺花等五人寇大敗遁去璽書慰勞遣醫視進都指揮同知賜銀幣尋以譚廣老命充右參將佐之洪建議加築開平城拓龍門所自獨石至潮河川增置墩臺六十尋進都指揮使與兀良哈兵戰三岔口又嘗追寇至亦把禿河再還都督同知九年兀良哈寇延綏洪與內臣韓政等出大同至黑山迤北邀破之克列蘇進左都督軍士蒙賞者九千九百餘人洪嘗請給旗牌不許乃自製小羽箭木牌令軍中有司論其專擅帝不問十二年充總兵官代郭玪鎮宣府自宣德以來迤北未嘗大舉入寇惟朵顏三衛乘

間擾邊多不過百騎或數十騎他將率異懷洪獨以敢戰至大將諸部亦憚之稱爲楊王瓦剌可汗脫脫不花太師也先皆嘗致書於洪並遺之馬洪聞於朝敕令受之而報以禮嗣後數有贈遺帝方倚任洪不責也帝既北狩遣宣府也先傳帝命趣開門城上人對曰所守者主上城池天已暮門不敢開且洪已他往也先乃擁帝去景帝監國論前後功封昌平伯也先復令帝爲書遺洪洪封上之時景帝已即位馳使報洪上皇書僞也自今雖真書毋受於是洪一意堅守也先逼京師急詔洪將兵二萬人衛比至寇已退敕洪與孫鏗范廣等追擊餘寇至霸州破之獲阿歸等四十八人還所掠人畜萬計及關寇返闕殺官軍數百人洪子俊幾爲所及寇去以功進侯命率所部留京師督京營訓練兼掌左府事朝廷以洪宿將所言多采納嘗陳禦寇三策又奏請簡汰三千諸營將校不得以貧弱充伍皆從之景泰元年于謙以邊警未息宜令洪等條上方略洪言四事命兵部議行都督宮聚王喜張斌先坐罪繫獄洪與石亨薦三人習戰請釋令立功詔已許而言官劾其黨邪撓政帝以國家多事務得人置不問上皇還洪與石亨俱授奉天朔衛宣力武臣子世券明年夏佩鎮朔大將軍印還鎮宣府從子能信充左右參將其子俊爲右都督管三千營洪自以一門父子官極品手握重兵威滿難居乞休致請調俊等他鎮帝不許八月以疾召還京踰月卒贈穎國公諡武襄妾葛氏自經以殉詔贈淑人洪久居宣府御兵嚴肅士馬精強爲一時邊將冠然未嘗專殺又頗好文學嘗請建學宣府教諸將子弟子傑嗣上言臣家一僕三都督蒼頭得官者十六人大懼不足報稱乞俸蒼頭楊釗等職詔許之仍令給俸傑卒無子庶兄俊嗣俊初以舍人從軍正統中累官署都指揮僉事總督獨石永寧諸處邊務景帝即位給事中金達奉使獨石勅俊食後乃召還也先犯京師俊敗其別部於居庸進都督僉事尋充右參將佐朱謙鎮宣府太監喜寧數誘敵入寇中朝患之購擒斬寧者賞黃金千兩白金二萬兩爵封侯寧爲都指揮江福所獲而俊冒其功廷臣請如詔帝以俊邊將職所當爲不允加右都督賜金幣俊恃父勢橫恣嘗以私憾杖都指揮陶忠至死洪懼俊輕躁恐誤邊事乞令來京隨臣操練許之既至言官交劾

下獄論斬詔令隨洪立功未幾冒擒喜軍功事覺詔追奪冒陞官軍別賞福等而降俊官令勦賊自効俄充遊擊將軍巡徼真保涿易諸城還督三千營訓練景泰三年俊上疏曰也先既弑其主併其衆包藏禍心窺伺邊境直須時動耳聞其妻孥輜重去宣府纔數百里我緣邊宿兵不下數十萬宜分爲奇正以待誘使來攻正兵列營大同宣府堅壁觀變而出奇兵倍道搗其巢彼必還自救我軍夾攻可以得志疏下廷議于謙等以計非萬全遂緩團營初設命俊分督四營明年復充遊擊將軍送瓦剌使歸至永寧被酒杖都指揮姚貴八十且欲斬之諸將力解而止貴訴於朝宣府參政葉盛亦論俊罪以俊嘗潰於獨石斥爲敗軍之將俊上疏自理封還所賜敕書以明己功言官劾其跋扈論斬錮之獄會傑卒傑母魏氏請暫釋俊營傑葬事乃宥死降都督僉事旋襲洪職家人告俊盜軍儲再論死輸贖還爵久之又以陰事告俊免死奪爵命其子珍襲俊初守永寧懷來聞也先欲奉土皇還密戒將士毋輕納既還又言是將爲禍本及上皇復位張軌與俊不協言於朝遂徵下詔獄坐誅奪珍爵戍廣西憲宗立授龍虎衛指揮使能字文敬沈毅善騎射從洪屢立功爲開平衛指揮使進都指揮僉事景泰元年進同知充遊擊將軍沿邊巡徼寇犯蔚州畏不進復與紀廣禦寇野狐嶺敗傷右膝爲御史張昊所劾宥之尋命與石彪各統精兵三千訓練備調遣再加都督僉事累進左副總兵協守宣府巡撫李秉勅其貪惰弗問五年召還總神機營天順初以左都督爲宣府總兵官與石彪破寇磨兒山封武強伯也先已死宰來繼興能欲約兀良哈共襲劫之與以信礮兵部劾其非計帝以能志在滅賊置不罪寇犯宣府能失利復爲兵部所劾帝亦宥之是年卒無子弟倫襲羽林指揮使信字文實幼從洪擊敵與州賊將方躍馬出陣前信直前擒之以是知名累功至指揮僉事正統末進都指揮僉事守柴溝堡也先犯京師入衛進都指揮同知景泰改元守懷來寇入不能禦護餉永寧聞礮聲奔還皆被劫朝議以方用兵不問累進都督僉事代能爲左副總兵協鎮宣府上言鹿角之制臨陣可捍敵馬結營可衛士卒每隊宜置十具遇敵團牌拒前鹿角列後神銃弓矢相繼迭發則守無不固戰無不克從之天順初移鎮

延綏進都督同知明年破寇青陽溝大獲封彰武伯佩副將軍印充總兵官鎮守如故延綏設總兵官佩印自信始也頃之破寇高家堡三年與石彪大破寇於野馬澗明年寇二萬騎入榆林信擊却之追奔至金鷄峪斬平章阿孫帖木兒還所掠人畜萬計其冬代李文鎮大同憲宗即位信自陳前後戰功予世券成化元年冬禦寇延綏無功召還督三千營毛里孩據河套命佩將軍印總諸鎮兵往禦寇既渡河北去已復還據套分掠水泉營及朔州信等屢却之寇遂東入大同因詔信還鎮大同六年信與副將徐恕參將張瑛分道出塞敗寇於胡柴溝獲馬五百餘匹重賞獎勵信在邊三十年鎮以安靜人樂爲用然性好營利代王嘗奏其違法事詔停一歲祿十三年冬卒於鎮贈侯諡武毅洪父子兄弟皆佩將軍印一門三侯伯其時稱名將者推楊氏昌平侯既廢能以流爵弗世而信獨傳其子瑾弘治初領將軍宿衛三傳至曾孫炳隆慶時協守南京召掌京營戎政屢加少師卒諡恭襄傳子至孫崇猷李自成陷京師被殺石亨渭南人生有異狀方面偉軀美髯及膝其從子彪魁梧似之類亦過腹就飲酒肆相者曰今平世二人何乃有封侯相享嗣世父職爲寬河衛指揮僉事善騎射能用大刀每戰輒摧破正統初以獲首功累遷都指揮僉事敗敵黃牛坡獲馬甚衆三年正月敵三百餘騎飲馬黃河亨追擊至官山下多所斬獲進都指揮同知尋充左參將佐武進伯朱冕守大同六年上言邊餉難繼請分大同左右玉林雲川四衛軍墾淨水坪迤西曠土官給牛種可歲增糧萬八千石明年又言大同西路屯堡皆臨極邊玉林故城去右衛五十里與東勝單于城接水草便利請分軍築壘防護屯種詔皆允行尋以敗敵紅城功進都指揮使敵犯延安追至金山敗之再遷都督僉事亨以國制搜將才未廣請倣漢唐制設軍謀宏遠智識絕倫等科令人得自陳試驗擢用不專保舉報可十四年與都督僉事馬麟巡徼塞外至箭豁山敗兀良哈衆進都督同知是時邊將智勇者推楊洪其次則亨亨雖偏將中朝倚之如大帥故亨亦盡力其秋也先大舉寇大同亨及西寧侯宋瑛武進伯朱冕等戰陽和口瑛冕戰沒亨單騎奔還降官募兵自効郎王監國尙書于謙薦之召掌五軍大營進右都督無何封武清

伯也。先逼京師。命偕都督陶瑾等九將分兵營九門外。德勝門當敵衝。特以命亨。于謙以尚書督軍。寇薄彰義門。都督高禮等却之。轉至德勝門外。亨用謙令。伏兵誘擊死者甚衆。既而圍孫鏗西直門外。以亨救引卻。相持五日。寇斂衆遁。論功。亨爲多。進侯景泰元年二月。命佩鎮朔大將軍印。帥京軍三萬人。巡哨大同。遇寇敗之。其秋。子世襲誥奏易儲。加亨太子太師。亨謙立。團營。命亨提督。充總兵官。如故。八年。帝將郊宿齋宮。疾作。不能行禮。召亨代。亨受命。榻前見帝病甚。遂與張軾曹吉祥等謀。迎立上皇。上皇既復辟。以亨首功。進爵忠國公。眷顧特異。言無不從。其弟姪家人。冒功錦衣者五十餘人。部曲親故。竄名奪門。籍得官者四千餘人。兩京大臣。斥逐殆盡。納私人重賄。引用太僕丞孫弘。郎中陳汝言。蕭瑋。張用瀚。郝璜。龍文。朱銓。員外郎劉本道。爲侍郎。時有語曰。朱三千。龍八百。勢焰熏灼。嗜進者競走其門。既以私憾殺于謙。范廣等。又以給事中成章。御史甘澤等九人。嘗攻其失貶黜之。數與大獄。構陷耿九疇。岳正。而戊楊瑄。張鵬。謫周斌。戚繼等。又惡文臣爲巡撫。抑武臣不得肆。盡撤遣。由是大權悉歸亨。亨無日不進見。數預政事。所請或不從。然見於辭色。卽不召。必假事以入。出則張大其勢。市權利。久之。帝不能堪。嘗以語閣臣李賢。賢曰。惟獨斷乃可。帝然之。一日。語賢曰。閣臣有事。須燕見。彼武臣何故頻見。遂敕左順門。非宣召。毋得納。總兵官。亨自此稀燕見。亨嘗白帝立碑於其祖墓。工部希亨指。請敕有司建立。翰林院撰文。帝以永樂以來。無爲功臣立碑。故事。責部臣。而令亨自立。初。帝命所司。爲亨營第。既成。壯麗踰制。帝登翔鳳樓見之。問誰所居。恭順侯吳瑾謬對曰。此必王府。帝曰。非也。瑾曰。非王府。誰敢僭踰若此。帝領之。亨既權倖人主。而從子彪。亦封定遠侯。驕橫如亨。兩家蓄材官猛士數萬。中外將帥半出其門。都人側目。三年秋。彪謀鎮大同。令千戶楊斌等奏保。帝覺其詐。敕斌等。拷問得實。震怒。下彪詔獄。亨懼。請罪。帝慰諭之。亨請盡削弟姪官。放歸田里。帝亦不許。及鞠。彪得繡蟒龍衣。及違式寢床諸不法事。罪當死。遂籍彪家。命亨養病。亨嘗遣京衛指揮裴瑄出關。市木道大同。指揮盧昭追捕亡者。至是。事覺。法司請罪亨。帝猶置不問。法司再鞠彪言。彪初爲大同遊擊。以代王增祿爲己功。王至

跪謝。自是數款彪。出歌妓行酒。彪凌侮親王。罪亦當死。因劾亨招權納賕。肆行無忌。與術士鄒叔彝等私誦天文。妄談休咎。宜置重典。帝命錮彪於獄。亨聞住罷朝。參時方議革奪門功。窮治亨黨。由亨得官者悉黜。朝署一清。明年五月。錦衣指揮遂果。奏亨怨望。與其從孫後等造妖言。蓄養無賴。專伺朝廷動靜。不軌迹已著。廷臣皆言不可輕宥。乃下亨詔獄。坐謀叛律斬。沒其家資。踰月。亨殞死。彪後並伏誅。彪驍勇敢戰。嘗用斧。初以舍人從軍。正統末。積功至指揮。同知也。先逼京師。既退。追襲餘寇。頗有斬獲。進署都指揮僉事。景泰改元。詔予實授。充遊擊將軍。守備威遠衛。敵圍土城。彪用礮擊死百餘人。遁去。塞上日用兵。彪勇冠流輩。每戰必捷。以故一歲中數遷。至都督僉事。恃亨勢。多縱家人占民產。又招納流亡五十餘戶。擅越關置莊壠田。爲給事中李侃御史張奎所劾。請並罪亨。景帝皆宥不問。但令給還民產。遣流亡戶復業而已。三年冬。充右參將。協守大同。嘗憾巡撫年富。抑己不得逞。及英宗復辟。召彪還。亨方得志。彪遂誣奏富罪。致之獄。未幾。進都督同知。再以遊擊將軍赴大同。備敵與參將張鵬等。哨磨兒山。寇千餘騎來襲。彪率壯士衝擊。斬把禿王。奪其旗。俘斬百二十人。追至三山墩。又斬七十二人。以是封定遠伯。遊擊如故。天順二年。命偕高陽伯李文赴延綏禦寇。以疾召還。尋充總兵官。明年。寇二萬騎入掠安邊營。彪與彰武伯楊信等禦之。連戰皆捷。斬鬼力赤。追出塞。轉戰六十餘里。生擒四十餘人。斬首五百餘級。獲馬駝牛羊二萬餘。爲西北戰功第一。捷聞。進侯。彪本以戰功起家。不藉父兄蔭。然一門二公。侯勢盛而驕。多行不義。謀鎮大同。與亨表裏。握兵柄。爲帝所疑。遂及於禍。後。天順元年。進士。助亨籌畫。都督杜清。出亨門下。後造妖言。有土木軍兵權語。蓋言杜也。事覺。侯伏誅。清亦流金齒。

郭登。字元登。武定侯英孫也。幼英敏。及長。博聞強記。善議論。好談兵。洪熙時。授勳衛。正統中。從王驥征麓川。有功。擢錦衣衛指揮僉事。又從沐斌征騰衝。遷署都指揮僉事。十四年。車駕北征。扈從至大同。超拜都督僉事。充參將。佐總兵官廣寧伯劉安。鎮守朱勇等軍。覆倉猝。議旋師。登告學士曹鼐。張益曰。車駕宜入紫荆關。王振不從。遂及於敗。當是時。大同軍士多戰死。城門晝閉。人心洶洶。登

慷慨奮勵修城堞繕器械拊循士卒弔死問傷親爲裹創傳藥曰吾誓與此城共存亡不令諸君獨死也八月也先擁帝北去經大同使袁彬入城索金幣登閉城門以飛橋取彬入登與安及侍郎沈固給事中孫祥知府霍瑄等出謁伏地慟哭以金二萬餘及宋瑛朱冕內臣郭敬家資進帝以賜也先等是夕敵營城西登謀遣壯士劫營迎駕不果明日也先擁帝去景帝監國進都督同知充副總兵尋令代安爲總兵官十月也先犯京師登將率所部入援先馳馳書奏奏至敵已退景帝優詔褒答進右都督登計京兵新集不可輕用上用兵方略十餘事景泰元年春偵知寇騎數千自順聖川入營沙窩登率兵蹕之大破其衆追至栲栳山斬二百餘級得所掠人畜八百有奇邊將自土木敗後畏縮無敢與寇戰登以八百人破敵數千騎軍氣爲之一振捷聞封定襄伯予世券四月寇騎數千奄至登出東門戰佯北誘之入土城伏起敵敗走登度敵且復至令軍士齎毒酒羊豕楮錢僞爲祭冢者見寇即裹走寇至爭飲食之死者甚衆六月也先復以二千騎入寇登再擊却之越數日奉上皇至城外聲言送駕還登與同守者設計具朝服候駕月城內伏兵城上俟上皇入即下月城關也先及門而覺遂擁上皇去時鎮守中官陳公忌登會有發公奸賊者公疑登使之遂與登構帝謂于謙曰大同吾藩籬也公與登如是其何以守遣右監丞馬慶代公還登愈感奮初也先欲取大同爲巢穴故數來攻及每至輒敗有一營數十人不還者敵氣懾始有還上皇意上皇既還代王仕壘領登功乞降敕獎勞兵部言登已封伯乃止二年登以老疾乞休舉石彪自代且請令其子嵩宿衛帝以嵩爲散騎舍人不聽登辭是時邊患甫息登悉心措置思得公廉有爲者與俱遂劾奏沈固廢事而薦尙書楊寧布政使年富以言大同既有御史又有巡按御史僉都御史任寧宜止巡撫宣府帝悉從之以年富代固而徵還固及寧其秋以疾召還登初至大同士卒可戰者纔數百馬百餘匹及是馬至萬五千精卒數萬屹然成巨鎮登去大同人思之初英宗過大同遣人謂登曰朕與登有姻何拒朕若是登奏曰臣奉命守城不知其他英宗銜之及復辟登懼不免首陳八事多迎合尋命掌南京中府事明年召還官官勒登結陳汝言復召

鞫實論斬宥死降都督僉事立功甘肅憲宗即位詔復伯爵充甘肅總兵官奏邊軍價馬艱甚至鬻妻子乞借楚慶肅三王府馬各千匹官酬其直從之用朱永等薦召掌中府事總神機營兵成化四年復設十二團營命登偕朱永提督八年卒贈侯諡忠武登儀觀甚偉髯垂過腹爲將兼智勇紀律嚴明料敵制勝動合機宜嘗以意造擲地龍飛天網鑿深塹覆以土木如平地敵入圍中發其機自相撞擊頃刻皆陷又倣古製造偏箱車四輪車中藏火器上建旗幟鉤環聯絡布列成陣戰守皆可用其軍以五人爲伍教之盟於神祠一人有功五人同賞罰亦如之十伍爲隊隊以能挽六十斤弓者爲先鋒十隊領以一部指揮立功無相撓罪有專責一時稱善登事母孝居喪兼禮能詩明世武臣無及者無子以兄子嵩爲子登謫甘肅留家京師嵩窘其衣食登娶縫紉自給幾殆弗顧登還欲黜之以其壻於會昌侯侯嘗活己隱忍不發及卒嵩遂襲爵後以非登嫡嗣止嵩身子參降錦衣衛指揮使

朱謙夏邑人永樂初襲父職爲中都留守左衛指揮僉事洪熙時隸陽武侯薛祿征北有功進指揮使宣德元年進萬全都指揮僉事正統六年與參將王真巡哨至伯顏山遇寇擊走之次閱安山遇兀良哈三百騎又敗之追至莽來泉寇越山澗遁去乃還時謙已遷都指揮同知乃以爲都指揮使八年充右參將守備萬全左衛明年與楊洪破兀良哈兵於克列蘇進都督僉事所部發其不法事帝以方防秋宥之復以北征功進都督同知帝北狩也先擁至宣府城下令開門謙與參將紀廣都御史羅亨信不應遂去進右都督與楊洪入衛會寇已退追襲之近畿戰失利洪劾之兵部並劾洪不救景帝俱弗問洪入總京營廷議欲得如洪者代之僉舉謙乃進左都督充總兵官鎮守宣府景泰元年四月寇三百騎入石峰口復由故道去降敕切責踰月復入犯謙率兵禦之次關子口寇數千騎突至謙拒以鹿角發火器擊之寇少却如是數四謙軍且退寇復來追都督江福援之亦失利謙率力戰寇不得入六月復有二千騎南侵謙遣都指揮牛璽等往禦戰南坡謙見塵起率參將紀廣等馳援自己至午寇敗遁論功封撫寧伯是時寇氣甚驕屢擾宣府大同意二城且旦夕下而謙守宣

府郭登守大同數挫其衆也先知二人難犯始一意歸上皇八月上皇還道宣府謙率子永出見厚犒其使者既而謙謬報寇五千騎毀牆入察之則也先貢使也詔切責之謙惶恐謝明年二月卒於鎮贈侯子永襲謙在邊久善戰然勇而寡謀故其名不若楊洪石亨郭登之著成化中諡武襄永字景昌偉軀貌顧盼有威初見上皇於宣府數目屬焉景泰中嗣爵奉朝請英宗復辟睹永識之曰是見朕宣府者耶永頓首謝即日召侍左右分領宣威營禁軍天順四年宣大告警命帥京軍巡邊七年統三千營尋兼神機營憲宗立改督團營領三千營如故成化元年荆襄盜劉通作亂命永與尙書白圭往討進師南漳擊斬九百有奇會疾留南漳而圭率大軍破賊永往會道遇餘賊俘斬數百人其秋復進討石龍馮喜皆捷論功進侯毛里孩犯邊命佩將軍印會彰武伯楊信禦之會遣使朝貢乃班師六年阿羅出寇延綏復拜將軍偕都御史王越都督劉玉劉聚往討擊敗之蘇家寨寇萬騎自雙山堡分五道至戰於開荒川寇少却乘勢馳之皆棄輜重走至牛家寨遇都指揮吳瓚兵少寇圍之指揮李錦勝忠至復力戰聚及都指揮范瑾神英分據南山夾擊寇乃大敗斬首一百有六獲馬牛數千阿羅出中流矢遁時斬獲無多然諸將威力戰追敵邊人以爲數十年所未有論功予世侯阿羅出雖少挫猶據河套明年正月寇屢入永所部屢有斬獲三月復以萬餘騎分掠懷遠諸堡永與越等分兵爲五設伏敗之追至山口及硯忽都河寇敗走而遊擊孫鉞蔡瑄別破他部於鹿窖山捷聞璽書獎勞永等再請班師皆不許寇復以二萬餘騎入掠擊退之歲將盡乃召永還留越總制三邊十四年加永太子太保明年冬拜靖虜將軍東伐以中官汪直監督軍務還進爵保國公又明年正月延綏告警命永爲將軍越提督軍務直仍監督分道出塞越與直選輕騎出孤店關倖寇於威寧海子而永率大軍由西路出榆林不見寇追回遠費兵食巨萬馬死者五千餘匹於是越得封伯直廢錫躡等而永無功賞不行久之進太子太傅十七年二月復偕直越出師大同禦亦思馬獲首功百二十遂賜襲世公十九年秋小王子入邊宣大告急越與直已得罪以永爲鎮朔大將軍中官蔡新監其軍督諸將周玉李璵等擊敗之還

仍督團營或投匿名書言永圖不軌永乞解兵柄不許其冬手敕加太傅太子太師弘治四年監修太廟成進太師永治軍嚴肅所至多奏功前後八佩將軍印內總十二團營兼掌都督府列侯勛名無與比九年卒追封宣平王諡武毅子暉嗣給事中王廷言永功不當公朝議止予襲一世後皆侯詔可暉字東陽長身美髯人稱其威重類父又屢從父塞下歷行陣時以爲才弘治五年授勳衛年垂五十始嗣爵分典神機營十三年更置京營大帥命暉督三千營兼領右府事火篩入大同平江伯陳銳等不能禦命暉佩大將軍印代之比至寇已退乃還明年春火篩運小王子大入延綏寧夏右都御史史琳請濟師復命暉佩大將軍印統都督李俊李澄楊玉馬儀劉寧五將往而以中官苗達監其軍至寧夏寇已飽掠去乃與琳達率五路師搗其巢於河套寇已徙帳僅斬首三級獲馬駝牛羊千五百以歸未幾寇入固原轉掠平涼慶陽關中大震兩鎮將嬰城不敢戰而暉等畏怯不急赴比至斬首十二人還所掠生口四千遂以捷聞是役也大帥非制勝才師行紆迴無紀律邊民死者徧塗諸郡困轉輸餉軍費八十餘萬他徵發稱是先後僅獲首功十五級廷臣連章劾三人罪帝不問已而上搗巢有功將士萬餘人尙書馬文升大學士劉健持之帝先入達等言寬錄二百十人署職一級餘皆被資及班師帝猶遣中官齎羊酒迎勞言官極論暉罪終不聽以暉總督團營領三千營右府如故武宗即位寇大入宣府復命暉偕達琳師往寇轉掠大同參將陳雄擊斬八十餘級還所掠人口二千七百有奇暉等奏捷列有功將士二萬餘人兵部侍郎聞仲宇大理丞鄧璋往勘所報多不實終以達故衆咸給賜劉瑾用事暉等更奏錄功太薄請依成化間白狐莊例兵部力爭不納竟從暉言得擢者千五百六十三人暉加太保正德六年卒子麒襲侯嘗充總兵官鎮兩廣與姚鎮平田州誅岑猛加太子太保嘉靖初召還久之守備南京卒子岳嗣亦守備南京隆慶中卒四傳至孫國弼天啓中楊漣劾魏忠賢國弼亦乞速賜處分忠賢怒停其歲祿崇禎時總督京營溫體仁柄國國弼抗疏劾之詔捕其門客及繕疏者下獄停祿如初及至南京進保國公乃與馬士英阮大鍼相結以訖明亡

孫鏜字振遠東勝州人。襲濟陽衛指揮同知。用朱勇薦。進署指揮使。正統末。擢指揮僉事。充左參將。從總兵官徐恭討葉宗留。敗賊金華。復破之。烏龍嶺。英宗北狩。景帝召鏜還。超擢都督僉事。典三千營。也先將入犯。進右都督。充總兵官。統京軍一萬。禦之紫荆關。將發寇已入。遂營都城外。寇薄德勝門。爲于謙等所卻。轉至西直門。鏜與大戰。斬其前鋒數人。寇稍北。鏜逐之。寇益兵圍鏜。鏜力戰不解。高禮毛福壽來援。禮中流矢。倉石亨兵至。寇乃退。詔鏜副楊洪追之。戰於涿州深溝。頗有斬獲。師還。仍典營務。景泰初。楊洪劾鏜下獄。石亨請赦鏜。江淵亦言城下之役。惟鏜戰最力。乃釋之。三年冬。充副總兵。協郭登鎮大同。登節制嚴。鏜不得逞。欲與分軍。且令子百戶宏侮登。帝械宏。竟以鏜故。贊之。召還。典三千營。如故。英宗復辟。以奪門功。封懷寧伯。尋子世券。天順初。甘肅告警。詔鏜充總兵官。帥京軍往討。將陞。病。宿朝房。夜二鼓。太監曹吉祥。昭武伯曹欽反。其部下都指揮馬亮告變於恭順侯吳瑾。瑾趨語鏜。鏜草奏叩東長安門。自門隙投入。內廷始得集兵。縛吉祥守皇城諸門。鏜走太平侯張瑾家。邀兵擊。瑾不敢出。鏜倉猝復走宣武街。急遣二子輔。軌呼征西將士。給之曰。刑部囚反獄。獲者重賞。衆稍聚至二千人。始語之。故時已黎明。遂擊欽。欽方攻東長安門。不得入。轉攻東安門。鏜兵追及。賊稍散。軌斂中膊。軌亦被殺。欽知事不成。竄歸其家。猶督衆拒鏜。力戰至晡。始定。論功第一。進爵。世侯。仍典三千營。贈軌百戶。世襲。鏜繼猛善戰。然數犯法。初賄太監金英。得還都督。事覺。論斬。景帝特宥之。天順末。以受將士賄。屢被劾。不自安。求退。詔解營務。及府軍前衛事。猶掌左府。憲宗卽位。中官牛玉得罪。鏜坐與玉婚。停祿閒住。尋陳情。子半祿已復自陳。功狀給祿。如故。成化七年卒。贈涑國公。諡武敏。子輔。請嗣。吏部言。奪門功。例不得世傳。帝以鏜捕反者。子之傳。子至孫應爵。正德中。總督團營。四傳至曾孫世忠。萬曆中。鎮守湖廣。總督漕運。凡二十年。又三傳至孫維藩。流賊陷京師。被殺。鏜之冒奪門功。封伯爵也。都督董興及曹義施聚趙勝等。皆乘是時。冒封。子世券。與義聚自有傳。趙勝。字克功。遷安人。襲職。爲永平衛指揮使。正統末。禦寇西直門。進都指揮僉事。天順初。與孫鏜等預奪門功。超遷都督僉事。又與鏜擊反者曹

欽。進同知。率來犯。甘肅。勝與李杲充左右參將。從白圭西征。至固原。擊寇。却之。憲宗立。典鼓勇營訓練。成化改元。山西告警。拜將軍。次雁門。寇已退。乃還。明年。復出延綏。禦寇。會方納款。遂旋師。尋典耀武營。四年。充總兵官。鎮遼東。七年。召典五軍營。已改三千營。卽如思蘭犯宣府。詔勝爲將軍。統京兵萬人禦之。亦以寇遁。召還。久之。進左都督。加太子太保。十九年。封昌寧伯。勝初與李杲並有名。後屢督大師。未見敵。無功。責緣得封。名大損。後加太保。營萬貴妃塋。墮崖石間死。贈侯。諡壯敏。弘治初。孫鏜乞襲爵。吏部言。勝無功。不當傳世。乃授錦衣衛指揮使。

范廣遼東人。正統中。嗣世職。爲寧遠衛指揮僉事。進指揮使。十四年。積功遷遼東都指揮僉事。廣精騎射。驍勇絕倫。英宗北狩。廷議舉將材。尙書于謙薦廣。擢都督僉事。充左副總兵。爲石亨副也。先犯京師。廣躍馬陷陣。部下從之。勇氣百倍。寇退。又追敗之。紫荆關。錄功。命實授。俄進都督同知。出守懷來。尋召還。景泰元年二月。亨出巡邊。時都督衛穎統大營。命廣協理。三月。寇犯宣府。敕兵部會諸營將。遴選將材。僉舉廣。命充總兵官。偕都御史羅通。督兵巡哨。駐居庸關外。數月。還京。副石亨提督團營軍馬。亨所爲不法。其部曲多貪縱。廣數以爲言。亨銜之。譖罷廣。止領毅勇一營。廣又與都督張軌不相能。及英宗復辟。亨軌恃奪門功。誣廣黨附于謙。謀立外藩。遂下獄。論死。子昇。戍廣西。籍其家。以妻孥第宅賜降。丁明年春。軌早朝還。途中爲拱揖狀。左右怪問之。曰。范廣過也。遂得疾。不能睡。痛楚月餘而死。成化初。廷臣訟廣冤。命子昇仍襲世職。廣性剛果。每臨陣。身先士卒。未嘗敗。一時諸將。盡出其下。最爲于謙所信任。以故爲僞輩所忌。贊曰。楊洪石亨輩。遭時多事。奮爪牙之力。侯封世券。照耀一門。酬庸亦過厚矣。洪知感滿可懼。而亨邪狠粗傲。怙寵而驕。其赤族宜哉。朱謙勇略不及郭登。登乃無後。而謙子永進爵上公。子孫世侯勿絕。孫鏜范廣善戰略相等。而廣以冤死。所遇有幸有不幸。相去豈不遠哉。

總纂高麗理事務 經總辦高麗事務太子太保保和殿大學士兼管吏部戶部書事左六級張廷玉等奉
敕修

史 昭 劉 昭 李 達 巫 凱 曹 鏡 施 聚 許 貴 子 寧

周 賢 子 玉 歐 信 王 璽

魯 鑑 子 麟 孫 經 劉 寧 周 璽 莊 鍾 彭 清

姜 漢 子 寅 孫 應 熊 安 國 杭 雄

史昭合肥人永樂初積功至都指揮僉事八年充總兵官鎮涼州土軍老的罕先與千戶虎保作亂虎保敗老的罕就撫昭上書言其必叛狀未至而老的罕果叛昭與都指揮滿都等擊平之移鎮西寧仁宗立進都督僉事上言西寧風俗鄙悍請設學校如中土報可宣德初昭以衛軍守禦不暇屯種其家屬願力田者七百七十餘人請俾耕藝收其賦以足軍食從之五年由先衛都指揮使散即恩邀劫西域使臣昭率參將趙安偕中官王安王瑾討之長驅至曲先散即恩望風遁擒其黨答答不花等獲男女三百四十人馬駝牛羊三十餘萬威震塞外捷聞璽書慰勞賞賚加等七年春以征西將軍鎮寧夏字的達里麻犯邊遣兵擊之至闊台察罕俘獲甚衆進都督同知正統初詔以寧夏孤懸河外東抵綏德二千里曠遠難守請於花馬池築哨馬營增設烽墩直接哈刺兀速之境邊備大固尋進右都督時阿台朵兒只伯數寇邊詔昭與甘肅守將蔣貴趙安進剿並無功被詔切責貶都督僉事三年復右都督八年以老召還明年卒昭居寧夏十二年老成持重兵政修舉亦會敵勢衰弱邊境得無事兵部尚書王驥寧夏參將王榮書舉其過朝議以昭守邊久習兵事不易也而與昭並為邊將最久有勳績可稱者都督同知劉昭鎮西寧二十年都指揮李達鎮洮州至四十年並為蕃漢所畏服劉昭全椒人永樂五年以都指揮同知使朵甘烏思藏建驛站還至靈藏番賊邀劫昭敗之進都指揮使鎮洮州宣德二年副陳懷討平松潘寇累進都督同知移西寧復鎮洮州兼轄西寧罕東酋劉兒加邀殺中官使西域者奪璽書金幣去命昭副甘肅總兵官劉廣討之劉兒加請

還所掠書幣賈馬贖罪帝以窮寇不足深治命昭等還李達定遠人累官都督僉事正統中致仕

巫凱句容人由廬州衛百戶積功至都指揮同知永樂六年以從英國公張輔平交趾功遷遠東都指揮使十一年召帥所部會北京明年從征沙漠命先還凱言諸衛兵宜以三之二守禦而以其一屯糧開原市馬悉給本衛乘操從之宣宗立以都督僉事佩征虜前將軍印代朱榮鎮遠東時中國人自塞外脫歸者令悉送京師俟親屬赴領凱言遠道往來恐致失所阻遠人慕歸心乃更令有馬及少壯者送京師餘得自便敵掠西山凱擊敗之盡得所掠者降救獲勉帝嘗遣使造舟松花江招諸部地遠軍民轉輸大困多逃亡會有警凱力請罷其役而逃軍入海西諸部者已五百餘人既而造舟役復興中官阮亮民都指揮劉清等董之多不法致激變凱劾亮民等下之吏英宗登極進都督同知上言邊情八事請厚恤死事者家益官吏折俸鈔歲給軍士冬衣布棉軍中口糧芻粟如舊制且召商實邊俱允行未幾為兵部尚書王驥所劾朝廷知凱賢令凱自陳并論廷臣文武官有罪得實始奏誣者罪不貸凱由是得行其志正統三年十二月有疾命醫馳視未至而卒凱性剛毅饒智略馭衆嚴而有恩在遠東三十餘年威惠並行邊務修飭前後守東陲者曹義外皆莫及義字敬方儀真人以燕山左衛指揮僉事累功至都督僉事副凱守遠東凱卒代為總兵官凱名將義承其後廉介有守遠人安之兀良哈犯廣寧前屯詔切責命王翱往飭軍務劾義死罪頃之義獲犯邊字台等詔戮於市自是義數與兀良哈戰正統九年會朱勇軍夾擊斬獲多進都督同知累官左都督義在邊二十年無赫赫功然能謹守邊陲其麾下施聚焦禮等皆至大將英宗復辟特封義豐潤伯聚亦封懷柔伯居四年義卒贈侯諡莊武繼室李氏殉詔旌之施聚其先沙漠人居順天通州父忠為金吾右衛指揮使從北征陣歿聚嗣職宣德中備禦遼東累擢都指揮同知以義薦進都指揮使義與兀良哈戰聚皆從也先逼京師景帝詔聚與焦禮俱入衛策勸哭即日引兵西部下進牛酒聚揮之曰天子安在吾屬何心饗此比至寇已退乃還聚以勇敢稱官至左都督值英宗推恩得

封伯後義二年卒贈侯諡威靖義三傳至棟聚四傳至瑾吏部皆言不當復襲世宗特許之傳爵至明亡

許貴字用和江都人永新伯成子也襲職爲羽林左衛指揮使安鄉伯張安舉貴將才試騎射及策皆最擢署都指揮同知尋以武進伯朱冕薦擢山西行都司督操大同諸衛士馬正統末守備大同西路也先入寇從石亨戰陽和後口敗績貴力戰得還英宗北狩邊城悉殘破大同當敵衝人心尤恟懼貴以忠義激戰士敵來擊敗之進都指揮使景泰元年春充右參將敵寇威遠追敗之蒲州營奪還所掠人畜敵萬騎逼城下禦却之再遷都督同知大同乏馬命求民間得八百餘匹所司不給直貴爲請乃予之嘗募死士入賊壘劫馬百餘悉昇戰士士皆樂爲用分守中官韋力轉淫虐衆莫敢言貴劾奏之三年疾還京英宗復辟命理左府事尋調南京松潘地雜番苗密邇董卜韓胡舊設參將一人天順五年守臣告警廷議設副總兵以貴鎮守未抵鎮而山都掌蠻叛詔使道先剿之貴分兩哨直抵其巢運破四十餘寨斬首千一百級生擒八百餘人餘賊遠遁貴亦感風氣未至松潘卒帝爲輟朝一日賜賻及祭葬如制子寧字志道正統末自以舍人從軍有功爲錦衣千戶貴歿嗣指揮使用薦擢署都指揮僉事守禦柴溝堡成化初充大同遊擊將軍寇入犯與同官秦傑等禦之小龍州澗擒其右丞把禿等十一人改督宣府操練移延綏地逼河套寇數入掠孤山堡軍提孤軍奮擊之三戰皆捷寇渡河走明年復以三千騎入沙河墩與總兵官房能禦之寇退復掠康家岔軍出塞百五十里追與戰獲馬牛羊千餘而還時能守延綏無將略巡撫王銳請濟師詔大同巡撫王越帥衆赴越遣軍出西路破敵黎家澗進都指揮同知復遣軍與都指揮陳輝追寇獲馬騾六百朝廷以阿羅出復入河套頻擾邊命越與朱永禦而以寧才擢都督僉事佩增虜副將軍印代能充總兵官寧起世貴不十年至大將同列推讓不及父友多隸部下亦不以爲驟踰月寇大入永遣軍及遊擊孫鉞禦之至波羅堡相持三日夜寇乃解去亡失多寧以力戰得出卒被賞至冬賊入安邊寧追擊有功七年又與諸將孫鉞祝雄等敗寇於混忽都河重書褒獎迨北開元王把哈字羅屢

欲降內懼朝廷見罪外畏阿羅出警之傍僅不決寧請撫慰以固其心卒降之明年參將錢亮敗績於師婆澗士卒死者十三四寧與越等俱被劾帝不罪時滿都魯等屢犯延綏寧帥鎮兵力戰寇不得志乃出西路直犯環慶固原寧將輕騎夜襲之鴨子湖奪馬畜而還又明年寇入榆林澗與巡撫余子俊敗之滿都魯等大入西路留其家紅鹽池越乘間與軍及宣府將周玉襲破其巢進署都督同知與子俊築邊牆增營堡寇患少衰十八年寇分數道入寧慶之邊牆獲級百二十子實授時越方鎮大同命軍與易鎮至則與鎮守太監汪直不協巡撫郭鏗以聞調直南京小王子大入寧知敵勢盛欲持重俟隙乃斂兵守而別遣將劉軍童升與周重相犄角寇大掠焚代王別堡王趣戰使衆哭於轅門寧憤與鏗等營城外寇以十餘人爲誘太監蔡新部騎馳擊寧將士爭赴之遇伏大敗死者千餘人寧奔夏米莊鏗新馳入城會重等來援寇乃退寧還陣亡家婦子號呼詬置擲以瓦礫寧大喪氣已而寇復入劉寧宋澄莊鏗等禦之十戰少利寇退軍等掩其敗更以捷聞巡按程春震發之與鏗新俱下獄鏗降六官新以初任降三官寧降指揮同知閑住弘治中用薦署都指揮使分領操練十一年十二月卒贈都督僉事軍東髮從軍大小百十餘戰身被二十七創性沉毅守官廉待士有恩不屑干進劉寧神英李泉皆出麾下子泰自有傳

周賢滁人襲宣府前衛千戶景泰初累功至都指揮僉事守備西貓兒峪助副總兵孫安守石八城尋充右參將代安鎮守兀良哈入寇總兵官過與令宣府副將楊信及賢合擊賢不俟信徑擊敗之信被劾都御史李秉言信緩師賢亦棄約帝兩宥之天順初總兵官楊能奏賢擢都督僉事寇駐塞下能檄賢與大軍會失期徵下獄以故官赴寧夏隸定遠伯石彪寇二萬騎入安邊營彪率賢等擊之連戰皆捷追至野馬澗半坡墩寇大敗而賢追不已中流矢卒詔贈都督同知賢初下吏自以不復用及得釋感激誓死報竟如其志子玉字廷璧當嗣指揮使以父死事超二官爲萬全都司都指揮同知督理屯田進都指揮使充宣府遊擊將軍九年會昌侯孫繼宗等奉詔舉將才玉爲首詔率所部援延綏從王越襲紅鹽池進署都督僉事還守宣府寇入馬營赤城擊敗之兵部言

宣府諸大帥無功。玉所部三千人，能追敵出境，請加一秩，酬其勞。乃予實授。尋充宣府副總兵。十三年，佩征朔將軍印，鎮宣府，破敵紅崖，追奔至水磨灣，進署都督同知。十七年五月，寇復入犯，參將吳儼少監崖榮追出塞，至赤把都，爲所遮，兵分爲三，皆被圍。儼榮走據北山，因甚，守備張澄率兵進力戰，解二圍，抵北山下。儼榮已夜遁，澄拔其衆而還。死者過半，澄所部七百人，亦多戰死。詔錄澄功，治儼等罪。玉先以葛谷堡赤城頻受掠，凡三被論，至是復以節制不嚴見劾，帝皆置不問。十九年，小王子犯大同，敗總兵官許寧入順聖川大掠，以六千騎寇宣府。玉將二千人前行，巡撫秦紘兵繼進，至白腰山，擊敗之。指揮曹洪邀擊至西陽河，都指揮孫成亦敗寇七馬房。時寇乘勝氣甚銳，竟爲玉等所挫。一時稱其功。未幾寇復入，玉伏兵敗之。朱永至大同，復會玉軍擊敗之。鶴鵠峪進署右都督。余子俊築邊牆，玉不爲力，且與紘不相能。子俊惡之，奏與寧夏神英易鎮久之，復移鎮甘肅。宗嗣位，實授右都督。玉督邊牆工峻急，部卒張伏與等以瓦石投之。兵部言：捍卒漸不可長，遂戮伏與，戍其黨。土魯番貢獅子，願獻還哈密城及金印，贖所留使者。玉爲之奏，帝命與巡撫王繼經畫。既果來歸，玉等皆受賚。七年病歸，尋卒。諡武僖。玉初爲偏裨，及鎮宣府，甚有名。後洩甘肅部下屢失事，又侵屯田，死後事發，子襲職降二等。

歐信，嗣世職。金吾右衛指揮使。景泰三年，以廣東破賊功，擢都指揮同知。已命守備白羊口，還大寧都指揮使。天順初，以都督僉事充參將，守備廣東雷廉諸府，巡撫葉威薦其廉勇，進都督同知。代副總兵翁信，兩廣徭獠猖獗，開建殺官吏，帝趣進兵。信破賊化州之馬里村，再破之石城，擊斬海南衛反者邵瑄。時所在盜羣起，將吏不能定。廣西參將范信守潯，梧、韶盡在境內，陰納徭路，縱使越境流劫。約毋犯己，於是雷廉高肇悉被寇。帝命廣西總兵官陳涇及信合剿。時有斬賊而賊勢不衰，朝廷猶倚范信。會涇以罪徵，乃擢范信都督僉事，充副總兵，鎮廣東。而命信佩征蠻將軍印，代涇鎮廣西。成化元年，賊掠英德諸縣，信討斬五百餘人，奪還人口。韓雍督師，令信等分五哨，攻破大藤峽，已而餘賊復入潯州，信被劾，獲宥召還。理前府事。七年春，充總兵官，鎮守遼東，累收福餘三衛，言

者謂信已老，請召還。巡撫彭誼奏：官軍耆老五千餘人，皆言信忠謹有謀勇，累立戰功，威鎮邊陲。年六旬，騎射勝壯士，不宜召回。乃留鎮如故。久之，陳鉞代誼，鉞貪功，信不能違。十四年，爲巡按王崇之所劾，其冬，乃召歸。尋遣中官汪直等往按，直右鉞罪，信等下獄。鑄一官閣住，飲恨而卒。范信既從廣東，賊勢愈威，劫掠不止。乃語人曰：今賊仍犯廣東，亦我遣之耶？而是時都督顏彪佩征夷將軍印，討賊久無功，濫殺良民，報捷嶺南人咸疾之。

王璽，太原左衛指揮同知也。成化初，擢署都指揮僉事，守禦黃河七墅，巡撫李侃薦於朝。阿魯出寇，延綏命充遊擊將軍赴援，戰孤山堡，敗之。寇再入，戰漫天嶺，劉宗琦及漫塔水磨川皆有功。進都指揮同知，充副總兵，鎮守寧夏。九年，以將才與周玉同薦。十二年，擢署都督僉事，充總兵官，鎮守甘肅。黃河以西，自莊浪抵肅州南山，其外番人阿吉等二十九族所居也。洪武間，立石畫界，約樵牧毋越疆，歲久湮廢。諸番往往往闌入，而中國無賴人又潛與交通，爲邊患。璽請復畫疆域，召集諸番諭以界石，嚴恐官軍欺凌諸部。今復立之，聽界外駐牧，互市則入關。如此，番人必聽命，可潛消他日憂。帝稱善。從之。十七年，進署都督同知。時璽以都督僉事爲總兵官，而魯鑑以署都督同知爲參將。璽恐難於節制，乞解兵柄。故有是命。初，哈密爲土魯番所擾，使其將牙蘭守之。都督罕慎寄居苦峪口，近赤斤罕東，數相攻。罕慎勢窮無援，朝議救璽築城苦峪，別立哈密衛以居之。璽遣謀者問牙蘭，牙蘭不聽，得其所，羈掠九十餘人以歸。具悉虛實。十七年，召集赤斤罕東將士，犒以牛酒，令助罕慎。罕慎合二衛兵，夜襲哈密，及刺木等八城，遂復其地。仍令罕慎居之。事聞，獎勞資金幣。已罕東入寇，璽禦却之。請與師以討。帝念其常助罕慎，第遣使責諭。明年，北寇殺哨卒，璽率參將李俊及赤斤兵擊之於狼心山黑河西，多所斬獲。二十年，移鎮大同。璽有復哈密功，官不進。陳於朝，乃實授都督同知。璽習略諳諸文事，勇而有謀。廷臣多稱之。在邊二十餘年，爲番人所憚。弘治元年卒，賜祭葬，贈卹有加。

魯鑑，其先西大同人。祖阿失都鞏卜失加，明初率部落歸附。太祖授爲百夫長，俾統所部居莊浪。傳子失加，累官莊浪衛指揮同知。正統末，鑑嗣父職。久之，擢

署都指揮僉事。成化四年，固原滿四反，鑑以土兵千人從征，諸軍圍石城，日挑戰，鑑出則先驅，入則殿後，最爲賊所憚。賊平，進署都督同知，尋充左參將，分守莊浪，命其子麟爲百戶，統治土軍。十七年，坐寇入境，載罪立功，尋充左副總兵，協守甘肅。寇犯永昌，被劾，鑑疏辨，第停其俸兩月。俄命充總兵官，鎮守延綏，自陳往功，予實授。孝宗立，得疾致仕。弘治初，命麟襲指揮使，加都指揮僉事，已進同知。充甘肅遊擊將軍，魯氏世守西陲，有捍禦功，至鑑官益顯，其世業益大，而所部土軍生齒又日盛。麟既移甘肅，帝以土軍非鑑不能治，特起治之，且命有司建坊旌其世績。鑑乃條上邊務四事，多議行。鑑有材勇，遇敵輒冒矢石，數被傷，不爲沮，故能積功至大將。十五年，以舊創疾發卒，贈右都督，賜卹如制。時麟已由甘肅參將，擢左副總兵，豪健如其父，而恭順不如。先爲遊擊時，寇入永昌，失律，委罪副將陶積，下御史按當戍邊，但貶一秩。遊擊如故，暨爲副將，調韋州禦寇，寇大入，不能擊，遣都指揮楊琳邀之孔壩溝，琳大敗，不救，連被劾。麟自愆，止停俸二月。時已授麟子經官，令約束土軍，而麟奏經幼，土人不受約束，乞歸治之。不俟報，徑歸。帝用劉大夏言，從其請。武宗立，甘肅巡撫畢亨薦經及麟謀勇，令率所部協戰守。正德二年，經既襲指揮使，自陳嘗隨父有功，乃以爲都指揮僉事。未幾，麟卒，贈都督僉事，賜祭葬。故事，都指揮無卹典，以經乞破例予之。經積戰功，再遷都指揮使，充左參將，分守莊浪。復自陳功，閱兵部執不可。帝特命爲署都督僉事。世宗立，乞休，巡撫許鳳翔言：「經力戰被創，疾行愈且，世將敢戰，知名異域，今邊患棘，不宜聽其去。」帝乃諭留，且勞以銀幣，尋充副總兵，分守如故。嘉靖六年冬，以都督同知充總兵官，鎮守延綏。大學士楊一清言：「經守莊浪二十餘載，屢立戰功，其部下土軍非他人所能及，雖其子瞻已爲指揮僉事，奉命統轄，然年尚少，今陝西總兵官張鳳乃延綏世將，若調鳳延綏，而改經陝西，自可彈壓莊浪，無西顧患。」帝立從之。居二年，竟以疾致仕。久之，命瞻以本官守備山丹。經奏言：「自臣高祖後，世守茲土，今臣家居，瞻又移他鎮，土軍皇皇，不欲別附。若因此生他患，是墮先業而負世恩也。」乞令守故業可。二十二年，宣大有警，詔經簡壯士五千赴援，至而邊患已息，乃遣還。以經力疾趨召，厚賚之。明

年瞻卒，經以次子及孫皆幼，請得自轄土軍，詔許之。經驍勇，奉職寡過，繼祖父爲大帥，保功名，稱良將。三十五年卒，賜卹如制。

劉寧字世安，其先山陽人。襲世職爲永寧衛指揮使，勇敢善戰，自以冗散無所見，會延綏用兵，疏請效死，尙書白圭許之。屢以功遷都指揮使，充宣府遊擊將軍。周璽字廷玉，遷安人，嗣職爲開平衛指揮使，貧氣習兵書，善騎射，以征北功擢署都指揮僉事，充右參將，分守陽和，敕部兵三千訓練聽調。成化十六年，從王越征威寧海子，累進都指揮使。時邊寇無虛歲，十八年分道入掠，璽與遊擊董昇戰黑石崖，戰塔兒山，皆有功。璽進署都督僉事，遷大同副總兵。寧進都督僉事，改左參將，分守陽和。十九年秋，亦思馬因大入，大同總兵官許寧分遣璽守懷仁，寧與董昇營西山，自將中軍擊之。夏米莊敗績，寧昇被圍數重，幾陷，亟發巨礮擊之，敵多死。圍乃解。璽聞中軍失利，亟還兵援，夜遇敵，乘勝前，銳甚，璽厲將士曰：「今日有進無退，大呼陷陣，敵少却久之，短兵接，臂中流矢，拔鏃戰益急。」與子鵬及麾下壯士擊殺數十人，會寧兵至，中軍潰平，亦稍集，敵乃退。許寧等亦還，無何復入掠寧將兵三千，遇之聚落站西，連戰敗之，復敗之。白登柳林，又追敗之。小鶻鷄谷，而大同西路參將莊鑑亦邀其歸路，戰於牛心山，敵遂遁。時諸將多失利，許寧以下獲罪，而璽以功予實授。寧超遷都督同知，莊鑑以所部無失亡，亦資銀幣。鑑遠東人，天順中襲定遠右衛指揮使，驍猛有膽決，遇賊輒奮，數有功。累官都督僉事，掌左府。弘治十一年，佩鎮朔將軍印，鎮宣府，以才與大同總兵官張俊易鎮兵部侍郎熊繡奏其經畫功，進都督同知。璽尋以右副總兵分守代州，兼督偏頭諸關，而改寧左副總兵，協守大同。二人並著功北邊，稱名將。璽以偏頭去太原遠，請改分守爲鎮守，又以鎮守不當聽節制，乞易總兵銜，憲宗皆曲從之。弘治初，移鎮陝西，討平扶風諸縣附籍回回。三年，佩征西將軍印，鎮守寧夏甫一歲卒，且死召諸子曰：「吾佩印分閭，分已足，獨未嘗大破敵，抱恨入地矣。」連呼殺賊而瞑。子鵬，累官錦衣衛指揮僉事，璽歿後三年而寧佩平羌將軍印，鎮甘肅。其冬寇犯涼州，寧與戰抹山墩，擒斬五十餘，相持至暮，收輜重南行，寇復來襲，擒其長一人。明日，參將顏玉來援，副將陶積兵亦

至寇乃遁。俘其稚弱，獲馬駝牛羊二千。進右都督明年，與巡撫許進襲破土魯番於哈密，進左都督，增俸百石，以疾還京。十三年，大同告警，命寧為副總兵，從平江伯陳銳禦之。銳無將略，與寧不協，止毋戰。寇遂得志，去坐停半俸，閑住。尋以參將費盡朱暉軍務，亦無功。寧自陳哈密功，乞封伯，詔還全俸。寧有膽智，為大同副將時，入貢者數萬人，懷異志，寧率二十騎，直抵其營，眾駭愕。有部長勒馬引弓出，寧前下馬，與諸部長坐，舉策指畫，宣天子威德，一人語不遜，寧摑其面，奮臂起，其長叱之退。寧復坐與語，呼酒歡飲，皆感愜。卒如約，嘗仿古番上法，以五十八人為隊，隊伍重為陣，建五色幟，又各建五巨幟於中軍，中幟起，五陣各視其色，應之，循環無端。每戰用是取勝。晚再赴大同，已老病，帥又怯懦，故無成功。然孝宗朝，夏將稱寧十七年卒，贈廣昌伯。

彭清，字源潔，榆林人。初襲綏德衛指揮使，以功擢都指揮僉事。弘治初，充右參將，分守肅州。寇入犯，率兵躡之，獲馬駝器仗，及所掠人畜而還。尋與巡撫王繼恢復哈密有功，清雖位偏校，而好謀有勇略。各聞中朝，尤為尚書馬文升所器，嘗引疾乞休，文升力言於朝，慰留之。八年，甘肅有警，以文升薦，擢左副總兵，仍守甘肅。未幾，巡撫許進乞移清涼州，而是時哈密復為土魯番所據，文升方密圖恢復，倚清成功，言肅州多故，而清名著西域，不可易，乃遷文升既得楊翥策，銳欲搗哈密，襲牙蘭，乃發罕東赤斤暨哈密兵，令清統之為前鋒，從許進潛往，行半月，抵其城下，攻克之。牙蘭已先遁，乃撫安哈密遺種，全師而還。是役也，文升授方略，擬從間道往，而進仍由故道，牙蘭遂逸去，斬獲無幾。然番人素輕中國，謂不能涉其地，至是始知畏。清功居多，稍遷都指揮使。十年，總兵官劉寧龍擢清都督僉事代之。其冬，土魯番歸哈密，順王陝巴且乞通貢，西域復定，屢辭疾，請解兵柄，不允。十五年卒。清御士有恩久，鎮西陲，威名甚著，番夷憚之。性廉潔，在鎮遭母及妻妹四喪，貧不能歸葬，卒之日，將士及庶民婦孺皆流涕，遺命其子不得受賻贈，故其喪亦不能歸。帝聞之，命撫臣發帑錢資送歸里，賜祭葬如制。

姜漢，榆林衛人。弘治中，嗣世職，為本衛指揮使。御史胡希顏薦其材勇，進都指

揮僉事。充延綏遊擊將軍。十八年春，寇犯寧夏，與武營、漢帥所部馳援，遇於中沙墩，擊敗之。賜敕慰勞。武宗嗣位，寇大舉犯宣大，漢偕副總兵曹雄、參將王戰分道援，有功。尋代雄為副總兵，協守延綏。正德三年，移守涼州。明年冬，擢署都督僉事。充總兵官，鎮寧夏。漢馭軍嚴整，得將士心。甫數月，而安化王寘鐇謀逆，置酒召漢及巡撫安惟學等宴，酒半，其黨何錦等率眾入，即座上執漢。漢奮起，怒罵不屈，遂殺之。子爽逃免。賊平，訟於朝，詔賜祭葬，有司為立祠。春秋祭之。嘉靖時，復從巡撫張珩請，賜額憫忠，爽當嗣職。帝以漢死事，特進一官，為都指揮僉事。十一年，回賊魏景陽作亂，華陰諸縣悉被害，巡撫蕭紳檄爽討之。獲景陽，進署都指揮同知。充右參將，守肅州。嘉靖二年，擢右副總兵，分守涼州。進署都督僉事。充總兵官，鎮甘肅。回賊犯甘州，爽與戰張欽堡，敗走之。未幾，西海賊入千騎犯涼州，爽率遊擊周倫等襲擊於苦水墩，大敗之。斬首百餘級，殲其長，還所掠人口千二百，畜產二千。都指揮張錦亦戰死，錄功進署都督同知。吉囊他部寇莊浪，爽與遇分水嶺，再勝之。遂至平嶺，敵騎大集，爽伏兵誘之，復斬其長一人，獲首功七十。予實授十六年春，寇大入甘州，不能禦，貶二秩。載罪，尋以永昌破敵功，復署都督僉事。其冬，坐前罪罷。久之，以薦擢副總兵，協守大同。為總督翁萬達劾罷。卒。子應熊嗣，指揮使。擢宣府西路參將。二十七年春，俺答寇大同，總兵官周尙文戰曹家莊，應熊從萬達自懷來鼓譟揚塵，而西寇不測來塞，遂遁。累進都督僉事。充總兵官，鎮守寧夏。三十二年，套寇數萬騎屯賀蘭山，遣精騎掠紅井，應熊戒將士固守，以綴敵，而潛師攻敵營，斬首百四十級。進都督同知。越二年，套寇數萬，踰冰西渡，由寧夏山後直抵莊涼，應熊等掩擊，獲首功百餘。進右都督。御史崔棟劾其縱寇，褫職逮問。充為事官，赴塞上立功。四十年秋，寇六萬餘騎，犯居庸岔道口，應熊被圍於南溝，中五鎗墮馬，參將胡鎮殺數人，奪之歸。其冬，復為右都督。充總兵官，鎮守大同，以招徠塞外人口，增俸一級。四十二年，寇大舉犯畿輔，詔應熊等入援。諸鎮兵盡集，見敵勢盛，不敢擊。給事中李瑜遂劾應熊，及宣大總督江東保定總兵官祝福坐視胡鎮被圍，一卒不發，帝怒，降敕嚴責。會寇將遁，應熊禦之密雲，頗有新獲。寇退，帝令江東第諸將

功以應熊爲首詔增其祖職二級已錄防秋勞進左都督總督趙炳然劾其縱寇互市殘害朔州坐戍邊穆宗立赦還子顯祚襲職累官署都督僉事總兵官歷鎮山西宣府子弼亦至都督僉事爲援遼總兵官姜氏爲大將著邊功凡五世

安國字良臣綏德衛人初爲諸生通春秋子史知名里中後襲世職爲指揮僉事正德三年中武會舉第一進署指揮使赴陝西三邊立功劉瑾要賄國同舉六十人咸無賞瑾乃編之行伍有警聽調禁其擅歸六十人者悉大窘儕於戊卒不聊生而邊臣憚瑾竟無有收恤之者寘鐔反肆赦始放還通政叢蘭請收用瑾怒諷給事中張瓚等劾諸人皆庸才悉停其加官瑾誅始以故官分守寧夏西路尋進署都指揮僉事充右參將擢右副總兵協守大同徙延綏十一年冬寇二萬騎分掠偏頭關諸處國偕遊擊杭雄馳敗之崑崙州斬首八十餘級獲馬千餘匹寇遂遁初寇大入白羊口帝遣中官張忠都督劉暉侍郎丁鳳統京軍討之比至已飽掠去忠暉恥無功紀功御史劉澄甫擢國等功歸之大行遷賞忠等悉增祿予世廕尙書王瓊亦加少保廕子錦衣國時以署都督僉事爲寧夏總兵官僅予實授意不平不敢自列乃具疏力辭爲部卒重傷者乞敘錄瓊請再敘國功始進都督同知當是時倭倖擅朝債帥風大熾獨國以材武致大將端謹練戎務所至思盡職推將材者必歸焉在鎮四年卒特諡武敏杭雄字世威世爲綏德衛總旗雄承廕數先登積首功六遷至指揮使正德七年進署都指揮僉事勦賊四川尋守備西寧用尙書楊一清薦擢延綏遊擊將軍從都御史彭澤經略哈密偕副將安國破敵尙風進都督僉事改參將擢都督同知統邊兵操於西內武宗幸宣府大同雄扈從即拜大同總兵官嘉靖初汰傳奉官雄當貶以方守邊命署都督僉事鎮守如故小王子萬餘騎入沙河堡雄戰却之未幾復大入不能禦求罷不許移延綏召僉書後軍都督府三年秋土魯番侵甘肅詔尙書金獻民視師以雄佩平虜大將軍印充總兵官提督陝西延綏寧夏甘肅四鎮軍務列侯出征始佩大將軍印無授都督者至是特以命雄甫至寇已破走而雄亦得廢錦衣千戶既班師復出鎮寧夏吉囊大入

總督王憲檄雄等破之進都督同知寇入千騎乘冰犯寧夏雄及副總兵趙鎮禦之前鋒陷伏中雄等皆敗總督王瓊劾之奪官閒住明年卒雄敢戰嘗以數騎行邊敵虜至乃下馬積鞍爲壘跪而射之敵退解衣腋凝血乃知中飛矢武宗在大同見雄戰帷敵甚曰老杭窮乃爾寇至帝將親擊雄叩馬諫曰主人畜犬不使吠盜奚用犬爲願聽臣等効力帝笑而止少役延綏巡撫行臺既貴每至臺議事不敢正席坐曰此當年役所也正德嘉靖間西北名將馬永而下稱雄云

贊曰時平則將略無由見或綰符出鎮守疆禦侮著有勞效以功名終亦足尙矣許貴周賢魯鑑姜漢家世爲將勳閥相承而賢與漢死事尤烈彭清杭雄之清節斯又其最優者歟

明史卷一百七十四

明史卷一百七十五

列傳第六十三

總裁高拱事務
經筵講官少保兼太子太保和殿大學士兼管吏部戶部尚書加六級賜廷玉等奉
敕修

衛青子 董興 何洪 劉雄 劉玉

仇鉞 神英子 周曹 雄子 馮 碩

張俊 李 鉞 楊銳 崔 文

衛青字明德松江華亭人以薊州百戶降成祖積功至都指揮僉事莅中都留守司事改山東備倭永樂十八年二月蒲臺妖婦林三妻唐賽兒作亂自言得石函中寶書神劍役鬼神剪紙作人馬相戰闘徒衆數千據益都卸石柵寨指揮高鳳敗殲勢遂熾其黨董彥昇等攻下莒卽墨圍安邱總兵官安遠侯柳升帥都指揮劉忠圍賽兒寨賽兒夜刦官軍軍亂忠戰死賽兒遁去比明升始覺追不及獲賊黨劉俊等及男女百餘人而賊攻安邱益急知縣張旗承馬擒死戰賊不能下合莒卽墨衆萬餘人以攻青方屯海上聞之帥千騎晝夜馳至城下再戰大敗之城中外鼓謀出殺賊二千生禽四千餘悉斬之時城中旦夕不能支青救稍遲城必陷比賊敗升始至青迎謁升怒其不待已猝之出是日鰲山衛指揮王真亦以兵百五十人殲賊諸城賊遂平而賽兒卒不獲帝賜書勞青切責升尙書吳中等劾升且言升媚青功於是下升獄而擢青山東都指揮使真都指揮同知旗撫左右參議賞賚有差青還備倭海上尋坐事繫獄宣德元年帝念其功釋之俾復職時京師營繕役繁調及防海士卒青以爲言得番代英宗立進都督僉事尋卒青有孝行善撫士卒居海上十餘年海濱人思之請於朝立祠以祀次子穎正統初襲濟南衛指揮使景帝立奉詔入衛再遷至都指揮同知以石亨薦擢署都督僉事管五軍營右哨諭黃花鎮白羊口及西直門禦寇功累進都督同知景泰三年協鎮宣府逾年召還天順元年以奪門功封宣城伯子世琚出鎮甘肅字來入犯不能禦爲有司所劾詔不問亨敗賴以守邊故得無奪憲宗卽位廷議以穎不勝任乃召還會盡革奪門世爵穎以天順間征西番馬吉思冬沙諸族功自懇詔如故成化二年爲遼東總兵官尋

引疾罷給事中陳鉞等劾之下獄尋宥之弘治中卒贈侯諡壯勇傳子至孫鐸嘉靖時督神機營屢加太保兼太子太師四傳至時春崇禎時掌後府京師陷懷鐵券闔門十七人皆赴井死

董興長垣人初爲燕山右衛指揮使累遷署都指揮同知正統中新建伯李玉等舉興將才進署都指揮使京營管操復用薦擢署都督僉事充右參將從寧陽侯陳璘討鄧茂七破餘黨於建寧進都督同知南海賊黃蕭養圍廣州安鄉伯張安都指揮王濟戰死賊衆攻城益急詔拜興左副總兵調江西兩廣軍往討而以侍郎孟鑑贊理軍務與用天文生馬軾自隨與果銳不能戢下軾戒之景泰元年二月師至廣州賊舟千餘艘勢甚熾而徵兵未至諸將請濟師軾曰廣民延頸久矣卽以復兵往擊猶拉朽耳興從之旣而兵大集進至大洲擊賊殺溺死者萬餘人餘多就撫蕭養中流矢死函首以獻俘其父及子等餘黨皆伏誅論功進右都督留鎮廣東給事中黃士儔劾興寬縱降其官明年復職久之召還分督京營與曹吉祥結姻冒奪門功封海軍伯未幾充總兵官鎮遼東子世琚議革奪門者爵興以守邊得免吉祥誅乃奪興爵仍右都督發廣西立功以錦衣李貴薦復爵總兵官宣府再子世琚憲宗嗣位罷還已傳世襲家居十餘年卒

何洪全椒人嗣世職爲成都前衛指揮使正統中從征麓川景泰末從征天柱銅鼓皆有功屢遷都指揮使軍四川都司事與平東苗憲宗卽位論功擢都督僉事巡撫汪浩乞留洪四川許之德陽人趙鐸反自稱趙王漢州諸賊皆歸之連番衆數陷城殺將吏遣其黨何文讓及僧悟昇掠安岳諸縣洪斬悟昇生禽文讓鐸將逼成都官軍分三路討洪偕都指揮寧用趙彰明賊引去追至梓潼朱家河力戰賊少却洪乘勝陷陣後軍不繼爲賊所圍左右跳盪殺賊甚衆力竭而死洪勇敢善撫士號令嚴蜀將無及之者旣死官軍奪氣而四川都指揮僉事臨淮劉雄亦戰死雄剛勁遇敵輒前嘗捕賊漢州生禽七十餘人及鐸亂追之羅江大水河手賊數人賊連敗千戶周鼎偕雄前救之徑奔賊陣盡刺死詔贈洪都督同知子祭葬子節襲都指揮僉事雄贈都指揮同知賜祭命子襲

職超二官洪雖死綿竹典史蕭讓帥鄉兵擊鐸破之官兵頻進擊其黨稍散去鐸勢孤帥餘賊趨彰明千戶田儀等設伏梓潼而參將周貴直搗其巢賊大敗夜奔石子嶺儀亟進斬鐸賊盡平成化元年正月也

劉玉字仲璽磁州人生有膂力給侍曹吉祥家從征薊川授副千戶積功至都指揮僉事天順元年以奪門功進都督僉事尋充右參將守備潯州慶遠蠻剽博白及廣東之寧川玉偕左參將范信邀擊敗之俄命分守貴州從方瑛討東苗殲千把豬討西堡苗繫其魁楚得先後斬首千級毀其巢而還旋改右副總兵鎮守貴州吉祥誅玉下吏當斬以道遠不與謀免死謫海南副千戶六年帝將以谷登爲甘肅副總兵李賢言登不任玉老成乃復以爲都督僉事右副總兵鎮守涼州谷咥族叛會兵平之進都督同知成化四年滿俊亂固原白圭舉玉爲總兵官統左右參將夏正劉清討之兵分爲七玉與總督項忠抵石城賊已數敗會毛忠死玉亦被圍中流矢力戰得出相持兩月大小百十戰竟平之進左都督掌右府事自愬前西堡功命增俸百石掌耀武營六年充左副總兵從朱永出延綏五月河套部入犯玉帥衆禦却之逾年卒贈固原伯諡毅敏玉雖起僕隸勇決過人善撫士所至未嘗跡滿俊之叛據石城險屢敗官軍玉戰最力及論功祇賜秩一級時惜其薄子文襲指揮使

仇鉞字廷威鎮原人初以傭卒給事寧夏總兵府大見信愛會都指揮僉事仇理卒無嗣遂令鉞襲其世職爲寧夏前衛指揮同知理江都人故鉞自稱江都仇氏再以破賊功進都指揮僉事正德二年用總制楊一清薦擢寧夏遊擊將軍五年安化王寘鐸及都指揮何錦周昂指揮丁廣反鉞時駐城外玉泉營聞變欲遁去顧念妻子在城中恐爲所屠滅遂引兵入城解甲覲寘鐸歸臥家稱病以所將兵分隸賊管錦等信之時時就問計鉞亦謬輸心腹而陰結壯士遣人潛出城令還報官軍旦夕至鉞因給錦廣宜急出兵守渡口遏東岸兵勿使渡河錦廣果傾營出而昂獨守城寘鐸以弮牙召鉞鉞稱病亟昂來視鉞方堅臥呻吟伏卒猝起捶殺昂鉞乃被甲橫刀提其首躍馬大呼壯士皆集徑馳詣寘鐸第縛之傳寘鐸令召錦等還而密諭其部曲以禽寘鐸狀衆遂大潰錦廣

單騎走賀蘭山爲邏卒所獲舉事凡十八日而敗先是中朝聞變議以神英爲總兵官而命鉞爲副俄傳鉞降賊欲追殺還大學士楊廷和曰鉞必不從賊令知朝廷擢用志當益堅不然棄良將資敵人耳乃不追事果定而劉瑾驅陝西總兵官曹雄盡以鉞功歸之鉞竟無殊擢巡按御史閻睿訟其功詔奪俸三月瑾誅始進署都督僉事充寧夏總兵官尋論功封咸寧伯歲祿千石子世榮明年冬召掌三千營七年二月拜平賊將軍偕都御史彭澤討河南盜劉惠趙鑑以中官陸閻監其軍未至而參將馮積戰死洛南賊勢益熾已聞官軍將至遂奔汝州又聞官軍扼要害乃走寶豐復由舞陽遂平轉掠汝州東南敗奔固始抵潁州屯朱臯鎮承順宣慰彭明輔等擊之賊倉猝渡河溺死者二千人餘衆走光山鉞追及之命諸將神周姚信時源金輔左右夾擊賊大敗斬首千四百有奇湖廣軍亦破其別部買勉兒於羅田賊沿途潰散自六安陷舒城復還光山至商城官軍追之急賊復南攻六安將陷時源等涉河進敗之七里岡賊趨廬州至定遠西又敗還至六安分其衆爲二劉惠與趙鑑二弟鐸歸帥萬餘人北走南城而鑑道遇其徒張通及楊虎遺黨數千人勢復振掠鳳陽陷泗宿睢寧定遠於是澤與鉞計使神周追鑑時源金輔追惠姚信追勉兒勉兒鑑復合周信連敗之宿州追奔至應山其衆略盡鑑雖髮懷度腹潛至江夏飯村店軍士趙成執送京師伏誅源輔追劉惠連戰皆捷惠窘走南召指揮王謹追及於土地嶺射中惠左目自縊死勉兒數爲都指揮朱忠夏廣所敗獲之項城丁村餘黨邢本道劉資及楊寡婦等先後皆被禽凡出師四月而河南賊悉平趙鑑一名風子文安諸生也劉七等亂起鑑率家匿渚中賊驅之登陸將汚其妻女鑑素驍健有膂力手格殺二賊賊聚執之遂入其黨爲之魁賊專事淫掠鑑稍有智計定爲部伍勸其黨無妄殺移檄府縣約官吏師儒毋走避迎者安堵由是橫行中原勢出劉六等上嘗攻鉞州五日以馬文升方家居舍之去有司遣人齎招撫檄至鑑具疏附奏言今羣奸在朝舞弄神器濁亂海內誅戮諫臣屏棄元老舉動若此未有不亡國者乞陛下睿謀獨斷羣奸之首以謝天下即梟臣之首以謝羣奸其桀黠如此鉞既平河南賊移師會陸完共滅劉七等於

江北論功進世侯增祿百石仍督三千營八年大同有警命充總兵官統京軍禦之鉞上五事中請遣還京操邊軍停京軍出征以省公私之擾尤切時弊時不能用鉞既至值寇犯萬全河沙擊之斬首三級而軍士亡者二十餘人寇亦引去奏捷蒙賞朝論恥之帝詔諸邊將入侍豹房鉞嘗一入後輒力辭十年冬稱疾解營務詔給軍三十人役其家世宗立再起督三千營掌前府事未上卒年五十七謚武襄子昌以病廢孫鸞嗣侯世宗時怙寵通邊磔死爵除

神英字景賢壽州人天順初襲父職爲延安衛指揮使守備軍塞營屢將騎兵從都督張欽等征討有功成化元年尙書王復行邊薦英有謀勇進都指揮僉事以從征滿四功遷都指揮使充延綏右參將屢敗虜如思蘭兵進署都督僉事巡撫余子俊築邊牆命英董役工成受賚久之充總兵官鎮守寧夏移延綏復移宣府弘治改元移大同十一年馬市開英違禁貿易寇掠蔚州又不救言官連劾召還閑住尋起督果勇營嘗充右參將從朱暉禦寇延綏武宗立寇犯宣府與李俊並充左參將帥京軍以援尋以都督同知僉書左府剿近畿劇賊進右都督正德五年給事中段彥昂奏老命致仕當是時劉瑾竊政總兵官曹雄等以附瑾得重權英素習瑾厚賄之因自陳邊功乞敘錄特詔予伯爵吏兵二部持之下廷議而廷臣希瑾指無不言當封者遂封涇陽伯祿八百石未幾實鐸反命充總兵官討之未至賊已滅其秋瑾敗爲言官所劾詔奪爵以右都督致仕越二年卒子周翰累爲指揮僉事累官都指揮使充延綏右參將正德六年命以所部兵討河南流賊數有功再進都督同知賊平遂以副總兵鎮山西九年秋寇大入軍武關踰忻定襄軍化周擁兵不戰軍民死者數千詔巡撫官執歸京師周潛結貴近行至易州僞稱病自陳戰功帝乃宥周罪盡削其秩爲總旗而翰累指揮如故已責緣江彬入豹房驟復都督賜國姓典兵禁中遂與彬相倚爲聲勢納賄不貲彬敗周亦下獄伏誅

曹雄西安左衛人弘治末歷官都指揮僉事爲延綏副總兵武宗卽位用總督楊一清薦擢署都督僉事充總兵官鎮固原以瑾同鄉自附於瑾瑾欲廣樹黨日相親重正德四年雄上言故事布按二司及兵備道臣文移達總兵官者率

由都司轉達今邊務亟徵調不時都司遠在會城往返千里恐誤軍機乞如巡撫大同例徑呈總兵官便兵部尙書曹元希瑾意覆如其言既復受瑾屬奏雄鎮守未佩印宜如各邊例特賜印以重其權乃進雄署都督同知以延綏總兵官吳江所佩征西將軍印佩之而別鑄靖虜將軍印予江及總督才寬德寇沙窩爲所殺雄擁兵不救伴引罪乞解兵柄令子諡齋奏請京師瑾異詭說妻以從女而優詔襲雄令居職如故糾者反被責實鐸反寧夏雄聞變卽統兵壓境上令都指揮黃正以兵三千入靈州固士卒心約鄰境刻期討密焚大小二壩積草與守備史鏞等奪河西船盡泊東岸賊黨何錦懼急帥兵出守大壩以防決河雄乃令鏞潛通書仇鉞俾從中舉事賊遂成禽是役也功雖成於鉞而居外布置賊不內顧雄有勞焉捷聞瑾以平賊功歸之進左都督諡亦官千戶雄不安引咎自劾推功諸將降旨慰勞未幾瑾敗言官交劾降指揮僉事尋徵下獄以黨逆論死籍其家詔宥之與家屬永戍海南遇赦不原雄長子謙讀書能文有機略好施子故參政李嵩主事孔琦家貧甚雄請周卹其妻子以勸廉吏謙意也御史高隆先被逮無行賞謙爲治裝並卹其家受業楊一清聞一清將起用貽書止之曰近日關中人材連茹而起實山川不幸獨不留三五輩爲後日地耶時陝人率附瑾以進故謙云然雄下獄謙亦被繫爲怨家並死馮璉綏德衛人起家卒伍累功爲本衛指揮僉事弘治末擢署都指揮僉事守備偏頭關尋充參將分守寧夏西路以勇敢聞實鐸反馳奏告變事平進署都指揮同知已擢副總兵協守延綏正德六年七月盜起中原詔以所部千五百人入討至阜城遇賊積令軍中毋顧首級貪虜獲遂大敗賊逐北數十里俘斬八百六十有奇進解曹州圍執其魁朱諒錄功進都督僉事明年春劉惠趙鑑亂河南連陷鹿邑上蔡西平遂平舞陽葉縱掠南頓新蔡商水襄城復還駐西平積儲副總兵時源參將神周金輔擊敗之賊奔入城官軍塞其門乘夜焚死千餘人斬首稱是餘賊潰而西巡撫鄧璋等朝崇王於汝寧宴飲連日賊招散亡勢復振陷鄆陵滎陽汜水鞏圍河南府三日諸軍始集賊屯洛南覘官軍饑疲迎戰右哨金輔不敢渡洛積及源周方陣而後哨參將姚信所部京軍先馳

失利遽遁陣亂賊乘之積下馬殊死鬪援絕死焉贈洛南伯賜祭葬授其子大金都督僉事後賊平論功復陞一子世百戶明年是日積死所風霾大作又明年亦如之伊王奏聞敕有司建祠歲以死日致祭尋用給事中李鐸言歲給米二石帛二疋贍其家

張俊宣府前衛人嗣世職爲本衛指揮使累擢大同遊擊將軍弘治十二年以功進都指揮同知火篩入大同左衛大掠八日後遣兵三百邀其前復分兵三百爲策應而親禦之荆東莊依河結營擊卻三萬餘騎帝大喜立擢都督僉事未幾總兵官王璽失事被徵卽命俊代之其冬以寇入戴罪尋移鎮宣府中官苗達督師延綏檄大同宣府卒爲探騎俊持不遣達遂劾俊帝宥俊而命發卒如達言武宗初立寇乘喪大入連營二十餘里俊遣諸將李稽白王張雄王鎮穆榮各帥三千人分扼要害俄寇由新開口毀垣入稽遽前迎敵玉雄鎮榮各帥所部拒於虞臺嶺俊急帥三千人赴援道傷足以兵屬都指揮曹泰泰至鹿角山被圍俊力疾益調兵五千人持三日糧馳解泰圍復援出鎮又分兵救稽玉稽亦潰圍出獨雄榮阻山澗援絕死諸軍已大困收兵還寇追之行且戰僅得入萬全右衛城土馬死亡無算俊及中官劉清巡撫李進皆徵還御史郭東山言俊扶病馳援勸懲不宜偏廢乃許贖罪正德五年起署都督同知典神威營操練明年六月賊楊虎等自山西十八盤還破武安掠威曲周武城清河故城景州轉入文安與劉六等合都指揮桑玉屢敗僉事許承芳請濟師乃命俊充副總兵與參將王琮統京軍千人討之往來近畿數月不能創賊已朝議調邊軍協守賊遂連敗明年三月劉六劉七齊彥名龐文宣等敗奔登萊海套陸完檄俊軍萊州合諸將李鉞等邀之賊遂北走轉掠寶坻香河玉田俊急偕許泰卻卻退之帝喜勞以白金賊由武清西去未幾得疾召還俊賊平實授都督同知久之卒俊爲邊將持廉有謀勇其歿也家無贏資李鉞大同右衛人世指揮同知累功進都指揮僉事充參將協守大同山東盜起詔改遊擊將軍尋充副總兵與俊等邀賊復與劉輝都將傅鑑張椿等數立功賊平進都指揮同知充總兵官鎮鳳陽諸府尋以江西盜猖獗擢署都督僉事與都御史俞諷同

提督軍務賊王浩八據裴源山憑高發矢石官軍幾不支鉞下馬持刀督將士殊死鬪賊乃走追數十里禽之復以次討平劉昌三胡浩三等移駐餘干將擊遺賊之未下者疽發背卒於軍詔贈右都督蔭子都指揮僉事

楊銳字進之蕭縣人嗣世職爲南京羽林前衛指揮使正德初以才擢掌龍江右衛事督造漕舟於淮安寧王宸濠有異謀王瓊以安慶居要害宜置戍乃進銳署都指揮僉事守備其地銳與知府張文錦治戰艦日督士肄水戰十四年六月丙子宸濠反東下焚彭澤湖口望江己丑奄至安慶城下舟五十餘艘銳文錦與指揮崔文同知林有祿通判何景陽懷寧知縣王誥等禦之江潁已收兵入城被圍銳文軍城西文錦有祿軍城北景陽諸軍東南城西尤要衝銳晝夜拒戰殺傷賊二百餘斬其間諜乃稍卻七月丁酉賊悉兵至號十萬船艦相銜六十餘里宸濠乘黃龍泊黃石磯身自督戰江西僉事潘鵬在賊軍安慶人也宸濠令諭降呼銳及文錦語衆心頗搖吏黃洲者以大義責數之鵬漸而退既復持僞檄至其家僅見遙呼之銳腰斬以徇將射鵬鵬遂去衆心乃定賊怒圍城數周攻益急銳等殊死戰賊雲樓數十城中亦造飛樓射賊夜緇人焚賊樓賊置天梯廣二丈高於城版蔽之前後有門伏兵其中輪轉以薄城城上東葦沃膏燃其端梯稍近即投之須臾盡焚賊多死時軍衛卒不滿百乘城皆民兵老弱婦女饋餉人運石一二數日積如山賊攻城城上或投石或沸湯沃之賊輒傷銳等射書賊營諭令解散有亡去者乃募死士夜剗賊營賊大驚擾比曉稍定宸濠慚憤謂其下曰安慶且不克安望南都會聞伍文定等破南昌遂解圍去文出城襲擊又破之旬有八日而圍解事聞武宗大喜擢銳參將分守安徽池太寧國及九江饒黃銳薦鄭岳胡世寧帝卽召用世宗立論功擢都督僉事蔭子世千戶再遷僉書左府改南京右府充總兵官鎮遼東改督漕運鎮淮安嘉靖十年爲巡按御史李循義劾罷踰年卒崔文世爲安慶衛指揮使守城勞亞於銳世宗錄其功超三階爲都指揮使蔭子世百戶江淮多盜廷議設總兵官督上下江防擢文都督僉事任之改蒞南京前府專督操江久之卒